

四庫全書

集部

欽定四庫全書

集部

龍雲集卷

二十八至  
三十

詳校官庶吉士臣吳烜

侍讀臣孫球覆勘

總校官進士臣朱鈐

校對官中書臣王學海

謄錄監生臣曹躍淵

欽定四庫全書

龍雲集卷二十八

策問中

第一

宋 劉弇 撰

問古人有言當君而舉堯舜猶人子對厥親而反譽他人之父如孝文則曰務卑之而已毋甚高論然則近功急效古人良有取乎爾也前日業文之士往往以不談

堯舜三代為耻而其後世治功軒軒如劉漢李唐則類以為不足稱述而一切謝去有甚於仆道之芻狗夫孟子言必稱堯舜漢人欲舉明主於三代之隆茲誠示庶兆不朽之懿尚也若乃漢之文景武宣唐之太宗明皇雖弗逮堯舜三代明甚然豈無一日之長耶要亦有所謂不可誣者矣國家七聖繼繩神謀睿慮所以陶冶斯民而綿長久者甚備則堯舜三代之治信已復見吾世矣至於劉漢李唐平時掌運天下者於今獨無可追錄

者乎若曰漢雜霸道唐不純乎道德之序無足道者是  
夸說耳吾子夸乎其將掇之也

## 第二

問春秋昭回之光不燭之日久矣日者上聖宅心焉詔  
國子增置博士員自三經二禮外士有他日應書而備  
數有司者許別用春秋自占而其說則雜取三傳諸儒  
所長以闡秘邃茲誠遠覽旁紹力張經術之盛舉也然  
考之三傳時有可疑者而諸儒又未能悉到聖處則學

者定於誰而質諸乎夫尹氏一人也或以為女子或以為世卿仲子一人也或以為惠母或以為桓母謂為同邪其異既如彼乃若獻公之取虞虢穆公之拒蹇叔其本末先後反若出乎一人之辭謂為異邪其同又如此以至趙盾許止之事皆經所直書而三子者必曰趙穿謂不當藥有是哉又况諱魯黜周戎衛狄晉與夫實與桓文之說為不一耶且三子之得既如此矣而其解者喜為怪迂濶誕又有如東漢之何休者遷就立明期於

不窘又有西晉之杜預者彼范甯幾矣其失顧多在於  
摘撮衆家而寡所自負然則求不畔於經者獨誰乎就  
闕一子之言得之多者又誰也吾子能審擇乎此則有  
司亦將惟吾之擇矣可無考焉

### 第三

問三代之養老也或燕衣或縞衣或元衣然則班序顛  
毛以為統紀蓋自先世已然况叔末之後世乎凡人得  
年多故所養厚就事衆故智益明且其更到之春秋能

鑠其暫彫之質而不能反其彌邵之成德日削之饗粥  
能厭其謝事之欲而不能泯其諳練之素心則有天下  
者亦何事而不取助於無斁之耄老乎國家衣德紹休  
教孝乎元元之民亦可謂盡矣至其歲時養老憲典乞  
言則莫或聞焉寧亦有未暇耶考之禮有祝鯁祝餉執  
醬執爵之事在焉參之詩有乞言以成其福祿之美存  
焉揆之前代則西漢之於孔光東漢之於桓榮晉武之  
於王祥其區區典禮有所謂不可誣者矣今必欲迹累

前代之闢典舉而措之吾世以為甚盛觀當何施而可耶

第四

問傳曰王者大一統孟子曰創業垂統然則統之為言固有天下者之所欲一而又其所甚重者歟堯舜以德三代以德與功秦隋拓跋後唐晉漢周以力魏晉北齊後周齊梁陳以脅其所以有天下與所以為天下雖參差不齊蓋皆不出乎功德力脅而不幸其後揉於瓜剖

豆分之餘割裂四出於是始有一隅之天下交禪之正朔堯舜三代而下統之最可疑者其魏宋齊梁陳拓跋之魏宇文之後周高氏之北齊與夫末造之五代乎其始也陳壽蓋嘗統魏而偽吳蜀矣而江南之宋至號魏為索虜代北之魏或稱宋為島夷然則所謂統者尚焉所取正耶此宜前日學士大夫所以有正統霸統之論也夫功德力脅則吾固知之矣若乃夫統之正不正是有可疑者二三子商講流略舊矣願出一二以折考古

者之惑然則所謂正統霸統果若是其多歧哉

第五

問必將以無窮之後世望乎其一身則可考莫如功託天下之所甚重而處之不吾愧則彌彰莫若名臨功名之會於是焉將之若固有者莫如器成功完名統器而不知所從違先後者莫如識蓋不有功則莫益於吾生不有名則卒至於磨滅而無紀器不博則其志近以卑識不至則應焉者汨而躓此有為者之公患也然則古人

兼是四者而有之者誰乎或功名或器識得其一偏而亦足以有成者有人哉無有也吾子異時方將功以自許名以求聞援器以赴時資識以兼物則固不得而無說也必不得已於古之人擇焉其可

第六

問世傳王氏中說十篇觀其書簡潔峻整毅然如豪士自好者之不可犯而其所自為要不折衷於孔子者蓋鮮世至取其書配揚孟則如通信可謂賢者矣然通平

居顧嘗為大言或自謂名世或比董常於顏子至其續  
六經則尤號少所遜避而所謂中說者又嘗模竄剽取  
老莊論語之文以助瓌壯昔人至謂通書為大公家教  
厥有繇也或曰通出污世不激詭不足以明道或曰隋  
唐史無通傳其事迹又不旁見疑無有通者殆後人託  
為之也嗚呼通言仁壽大業後事與夫有唐之方興房  
杜未及禮樂若合符節至其論詩易春秋也有所謂決  
不偶然者然則非通尚誰者為之乎通之書既如此宜

必有可以施之方今者

第七

問王通有言安得圓機之士與共語九流哉蓋學者之於九流尚矣自馬遷著書論列百子而比次之其要有六則道家儒家墨家法家名家陰陽家是也其後班固述藝文志頗採取遷遺意弗論列者寔廣其術別而為九以為此九者其所自名家者也故謂之九流然固論九家其始必曰某家蓋出於某官則疑固蓋不徒附著

也至其論儒家則顧以為其流蓋出於司徒之官曾謂  
大儒之效而司徒之官乃可盡之乎且固號博物洽聞  
其言要必有足稽者然則所謂九家者於今何官近之  
使居是官者能各盡其一官之術亦足以為治乎訂正  
是否非吾子安屬

第八

問洮沫千里東走長淮歲漕七百萬石以實中都此汴  
水所以為國家不貲利也元豐中議臣懲創湍悍以為

異時霖霖決溢最患之大者而又苦於方冬閉沍不通  
則於是請導洛水自大梁以東絕睢陽抵盱眙一切畚  
客土築兩壩而狹之謂為清汴然成未再期間則澱淤  
膠澁舟上下相軋失便則首擊尾捩雖檣師擢工往往  
褫氣奪色而隨以惡聲蓋有日矣夫禹醜是渠分水勢  
為欲已害也而利在後世煬帝從而疏之事盤游也而  
功在今日是豈天意非人力耶今茲乃爾胎弊彼議者  
寧復有弗究之遺策也將毋為之者固不若無意而直

遂者耶抑亦故時自便於今日耶然前日論汴者以為  
隋已前蓋資梁宋積水以通餉運大業堤而遏之河始  
為患是說也豈信然耶然則仍故時與從今日孰利講  
遺策與緝餘弊孰急疏而決之當自何始求隋以前梁  
宋積水宜何所考信茲事體大二三子其毋務迂說

第九

問錢弊之在天下什伍穀帛而子母之則有國者資之  
以擅開闔與夫閭閻細民取以利用厚生而阜其財求

必是物也然則冶鑄之繫縣官利害輕重斷可識矣皇祐中舉天下歲入銅以斤計得五百一十萬八百三十四而為冶鑄之州有五曰饒曰池曰江曰建曰韶歲入錢以緡計者得一百四十六萬五千六百六十二方是時雖富民之錢其饒殆可編埒曾不以匱乏聞也自嘉祐治平已還銅額則夥矣冶監則增矣侵尋數十年間壺弊四出未有如渴錢之今日也爾來歲額至號十二萬以上而地產銅者日益加少且天地之寶藏豈誠有

限耶治未即其處耶殺額以趨者豈工不比耶殆有司  
過耶若乃銅日弊於鏤鏤之末飾一旦悟而摧之則將  
已晚矣其尚可及耶方開元盛時歲之入緡纔三十三  
萬七千不能當吾皇祐二十分之六而唐錢至布滿天  
下何今日額倍而反匱耶其試言之將語吾子乎使者

第十

問以募貨賄以阜百賈以究其亡靡利害而使贏不足  
之患去以應適當之償焉而使放於利者不得逞其私

欲此治世之法所以莫嚴於致詳之成周也厥有貿易之地類非有司如司市賈師司競肆長之徒程督糾逖其後加之禁誅彼其饕餮之細民直聽其自相勿罔而已而百家之聚千人之肆飲羊璞鼠以幸耳目之可掩者徃徃而是以至同廛而有倍售之魚鹽接膝而有貳價之芻茹布帛器械之不中度也權衡槩量之殊其大小輕重也若是則投足龍斷乃所以資規利之賤商而童子之三尺尚安有適市之不欺耶亦可謂至無等矣

今欲取司市十有二禁之在民與工商者出而檢焉意者其殆迂乎亦將以為真有補也

第十一

問詩曰懷德維寧宗子維城然則崇建親親屏衛王室雖前代盛時有不能廢焉者也昔周封國八百同姓五十有餘而漢興懲戒亡秦孤立之弊尊王子弟大啓九國自是以來率享國數百載則宗子之助所從來遠矣彼有以景帝遭七國之難武帝有淮南衡山之變與夫

西晉連更八王之禍遂謂諸侯無足與同憂患者噫是未知主父推恩之令行而姦臣乘之以代漢曹魏躡秦睽孤之迹伺而斃焉者終在司馬也皇家發祥璿源綿慶天枝聖子神孫繩繩翼翼相與蕃昌涵衍於百有餘年如東平河間者不知其幾何人也前日蓋嘗有自族屬之疏者用經術補吏矣有自武秩而更文資者矣然歲不過三四人其殆有才器淹茂而未有謁聞者歟如曰益出所以近而戚者因使司牧畿郡如古諸侯王比

則又患民故未悉諳練也如曰擢方聞莊重之士使輔  
焉若漢諸侯相與宋齊典籤之類則又是掣肘之說也  
然則深根固蒂為不可拔者將如誰世而後可耶

## 第十二

問灑掃應對雖始學者之末務聖人或有取焉而禮之  
有曲禮少儀也其本末隆殺大率為後進設則孰謂斯  
須之頃可置此不講乎今士之游庠序者亦不謂無志  
於學矣至其能缺然自視而每以不當於禮為恨者誰

哉夫趨隅拾級張拱布武與夫怡聲下氣屑屑之細謹  
初亦何預術業而術業非此殆無以資晦養則士獨何  
忍自比於野哉之由慙甚之黷且以為閑習未至焉猶  
有說也若乃盱衡抵掌以散木廢雁視一世之人而甚  
者有弗鋤之驕色自若之矜氣至并與魏冠侈袂而出  
之斯悔道也尚亦何說乎孔子曰立則見其參於前在  
輿則見其倚於衡而顏子乃所願則無伐善無施勞嗚  
呼至矣哉聖賢之事也二三子其亦有意於斯乎願聞

所以自勉者

第十三

問唐設租役調三法詳矣租取之田役取之身調取之家夫役之在民也力不輸焉然後免以絹則役者其三法之中最準者乎蓋其法歲役人二十日日當絹三尺大率得六丈焉唐自貞觀開元用之卒致太平則國家前日之役法蓋當本諸此矣且民以有限之財隸更到之役以積歲之儲支方來之費一日主者按籍大則輓

運之須弊其前小則椎酤倉場之償贖其後真若可疚者焉於是一切弛其平居之力而使人歲輸之泉謂為免役則甚矣先帝惠厚元元之意無有窮已也日者聖上纂承顧以為疇曩奉行之吏或未盡如法意而法又不能無弊也奮然取所謂役事者付之二三材臣使揆叙焉蓋自千金之家至一廛之氓皆罷所輸入矣故雖單丁孀戶緇黃之流鄉大夫之籍役之減焉者又過入前日十之四五則沐浴膏澤歌詠隆寬其有甚於此時

者乎嘗聞之矣法張持久者一時之苟且不存焉弊起  
功初者力繼之繕完每出其後焉草茅之吏如之何其  
可已也試參周漢隋唐以來有可以攸助於今者言之  
勿苟

第十四

問名者公器與其未吾忘也寧取毋多而古之人至有  
休影息迹絕志功名之會以與無聞焉者沉浮卒歲寂  
寥磨滅而不自以為悔是必以名為不得乎其心者矣

而吾孔孟之徒以為磨鈍振汙非名則不可故以名之不稱於沒世為可疾以四五十無聞焉者為不足畏以施諸身者為存乎令聞廣譽以顯乎父母者為在乎立身揚名然則名也果何負哉亦曰實而已矣世之學者則不然居則曰莫我知也進則曰莫吾與也顧其實方如不比之參辰無當之玉卮斯邈矣而尚怨人之莫我知不吾與則亦可謂寡所自審矣吾與二三子處有日矣必自以為名與實參宜何如也然則所謂名者亦

真可逃焉而吾將為賓耶將多取之無傷也抑亦可以  
初無意而後自得也當審處以告

第十五

問黨錮之禍痛哉言乎夫以李膺范滂數子之賢而或  
坐取鉗鉞或相枕以死而不悔則風俗之移人至如此  
也唐自太和以後犄角聲援平居蔽蝕人主之聰明以  
私相建置務為不可更易者皆其左右大臣躬自為之  
甚者至號牛李一日天子南面喟然太息以為去此徒

難於河北醜虜則可勝慨哉且以為君子固無所黨乎  
則易之泰何取於拔茅以其彙征劉向何取於禹稷皋  
陶之傳相汲引孔顏之交相稱譽也或曰人固不可以  
無黨顧邪正如何耳使此言誠是也則為人君者將何  
以識其邪正而去取之乎其試著之於篇

第十六

問全美備善不可人人而責有能有不能天之降才則  
然也聖人以謂將以必不勝之任而加之有涯之衆智

則是為恕心遠而缺事多故寧曰與人不求備用才惟其長而不寧曰吾將教玉人以追琢與夫責騏驥使捕鼠聽鵩鷃使窺晝而為不切之左數也夫公綽之恬淡寡欲以為滕薛大夫則迂矣張敞之刺煩理劇以為太子之傅則躓矣龐統才任治中而窘於縣宰黃霸最優潁川而憊於入相何則有所長者有所短也故曰四士精一德以事其君豈虛言哉方君相材官百吏赴事功如不及之時其間不無所當先者是說也顧以為非折

諸吾子莫究姑試言之求合孔子所謂使人器之者

第十七

問兵者已亂非所以胎亂與所以養亂且挈亂而遂至  
於喪天下也追觀前世兵制惟丘乘為完簡而有要其  
後西漢則有五營騎士六郡良家子貳師樓船伏波下  
瀨因事以立稱厥當作張材官羽林期門俠飛孤兒因  
稱以講才三代而下言兵者有足稽焉迨夫三國分天  
下鼎峙五胡據中原力爭代北相長雄而江左更紛放

於是兵制紊矣唐因周隋之舊始制府兵方其盛時十道置府至六百三十四悉有名號而關內二百六十有三皆以隸諸衛有警則疾征汎掃為勝兵無事則持饁從田為良農此其凜凜號有丘乘之遺意者也國初剗夷荒類團天下精兵聚之京師而禁軍之額合一百八十五自殿前侍衛兩司下至皇城驕驪率有所領此亦與西漢宿兵內地無以異也異時邊防號弓箭手者皆授以田此亦與唐隱兵於農無以異諸君試合前代之

得失以附之當今若曰兵事固大未易質諸草茅則雖微吾子誰不樂為此者

第十八

問山海之貨所以養人者不貲而茶之為利尤博秦漢以前未有以茶為禮者三國時孫皓每享韋曜許以茶薺代酒其後謝安過陸納納待以茶果自謂我家素風茲其椎輪與然亦未始有禁也味源寢闢羣嗜大騁故趙贇領度支而竹木茶漆類皆有稅實始於有唐之建

中張滂使鹽鐵奏立茶稅號十分稅一實始於有唐之  
貞元於是厚利始籠於縣官矣然猶陸羽著經毛文錫  
綴譜溫庭筠張又新裴汶之徒或纂茶錄或製水經或  
述顧渚至相踵於世百年已來極於嗜好略與飲食埒  
者其今日乎今日第茶者取郝源為上至如日注實峰  
閩坑雙港烏龍鴈蕩顧渚雙井鴉山嶽麓天柱之產雖  
雀舌鎗旗號品中勝絕不得與郝源方駕而馳也其品  
制之殊則有若金挺六花葉家白王家白其色類之殊

則有若的乳白乳頭金蠟面京挺好事者往往抵金茶  
民不遠千里此比歲之禁所以愈密於疇曩也日者議  
臣深究厥弊一切條上乞弛去權法以便公私語其大  
較則商之宜已詳矣若乃纖悉委曲尚亦有可言者乎  
二三子其考古以驗今毋忽

第十九

問先王建萬國親諸侯所以輔弼王室共守天下而為  
長世無窮之慮其為法甚密而小大之勢皆足以相維

持故曰天子萬乘諸侯千乘下至卿大夫百乘以大使

小以百使千

當作十

如身之使臂臂之運指而三代享國

最為長久自秦罷侯置守漢魏以後相承一法藝祖革

隋唐五代藩鎮之弊並設郡邑差擇守長幾二百年安

於太平原其創業造統之意豈不以京師之於州郡譬

猶虎兕之有爪牙鴻鵠之有羽翼爪牙不銛利不足以

滅百獸羽翼不完強不足以絕千里州郡事力不充不

足以杜漸防微而捍倉卒之變此理勢之所必至也議

者以為承平之久州郡之權日朘月削遂以寢輕若夫  
泉幣銖兩分歸於計司尺籍伍符移隸於諸將丁黃保  
伍外統於使者而州郡歛衽以尸百事之責是無異於  
委人以牛羊而絕其芻穀驅人於攻鬪而奪其芒刃其  
為患豈止廢壞毀傷而已哉苟欲使今之州郡漸復於  
古稽之前世輕重適中孰為最近夫圖治於未然觀變  
於甚微固儒者之職也試詳言之以蔽有司之惑焉

第二十

問干謁有禁著於令甲有自來矣吏弗加廸廼者聖上憫  
焉取元豐已來有司未盡推行者上自一二大臣下逮  
百執事之列凡府寺臺監號為要切與夫廩廩筦榷之煩  
拏一切申重之使毋敢不恪雖三代直道而行太古天  
下為公不加此矣夫寡特之與比周靜止之與躁動一  
人之身何求而不得顧上之人有以逆處其未至耳且  
異時日力弊於無涯之將迎公道屈於臨時之請託者  
今茲壞植謝舊宜不無其人矣異時操竿牘掄侈袂望

塵雅拜纍然乞憐者今茲削迹休影宜不無其人矣義  
命之不安廉恥之不力雖有知巧將不能善其後則吏  
議休之故也夫苟且之俗黜則儻勉服勤者奮奔競之  
風弭則篤於自信者興是則名為禁之勸在其中矣是  
宜學古人官者之所樂聞也諸君其試考古以驗今上  
以焜耀吾君相之盛舉下使斯民知公道之有在顧不  
遑歟

龍雲集卷二十八

欽定四庫全書

龍雲集卷二十九

宋 劉弇 撰

策問下

第一

問文字之職歷試

一作世

選之尤者漢有待詔金馬門梁

有文德殿北齊有文林館後周有麟德殿皆所以規恢  
英躔獎拔士類故必學涉詞尚足以高前躅擅當世然

後居之而不疑太宗之始旁引秦府記室合十八輩置之洪文館諏逮得失時號十八學士入館者自謂登道家蓬山開元中明皇更集仙殿為集賢以寵張說自是集賢之名因以不廢方其盛時韓翃閻伯璵孟堯朝陳兼李白之徒相與抽酣思振孤韻抵掌高睨至無敢誰何者一何翬哉近世雖有修撰校理校勘之號顧非其舊矣翰墨之壺至乃一變而為膏粱之區再變而為酬一作勞之地高謝偃蹇援一作筆不下尚修撰云耶汗

青磨滅於古初蟬蠹蕃息於當年尚校理云耶先帝創  
艾斯弊也一旦罷去之至盡挈其實以歸諸著作正字  
校書焉然議者尚以為白黑淆亂淄澠不判則不若用  
祖宗召試故事以訂其才否可也且恢文墨之地責之  
文墨之事則誰非文墨之人一日拔置嚴近俾之代王  
言運樞極此其出也孰謂勿試而可二三子試為具之

## 第二

問以言取人則迹掩於浮譽之易移而實喪於繁文之

每勝然考其猶有補者其賢良方正乎自孝文親策晁錯於廷其後十有餘載雖賢君磊磊更出治世凜凜相望然褒然之詔不害為歲下莫舉之罪特當作時議諸禮

官則誠以賢良方正飲助於人主為不少故也是以一雨暘之不若一日月之薄蝕民焉有未知之利疚國焉有未講之隆替一旦操筆天陞之旁皆得列而言焉決游氛之蔽虧增白日之末光古所謂不諱之朝蓋不過如此奈何其罷之哉彼說者不過曰君子惡訐以為直

又其記誦瑣瑣初非經奇是應罷耳曾不知得一通春秋明王體如漢之董仲舒得一奮不顧身排斥大閹如唐之劉蕡則彼賢良方正獨何負於得人哉自歷科以來豪傑魁磊之士抱器業蓄憤懣思欲一吐胸中之奇者幾人於茲矣且罷之誠便則古不宜有是科也日者固已復詩賦矣豈詩賦可復而是科未可復乎抑亦復之固自有漸乎將復與不復未足為科舉之增損也願聞所以不吾隱者

第三

問五代彫弊習俗之日久矣天右吾宋爰集有命藝祖  
神武震疊頓八紘而掩之卒定天下太宗祇欽靈承奠  
枕覆盂以冒生齒告成天孫揜迹覓古羈致二敵飽之  
金縉時則有若祥符嘉祐乾旋坤轉吏宿業而民向方時  
則有若治平元豐一祖五宗百年於茲蓄毓渾涵協登  
至平休哉粹乎不可尚已聖上龍飛奄宅四履祇厥顧  
命疚閔於心誠有意乎式往訓而席前休也然議者尚謂

凡祖宗詒孫謀以燕翼子振丕緒以紹昆裔者亦已勤矣曾未一二而舉行之則豈為之輔相者亦有待耶且宣王之始天下之勢不啻如綴旒棲苴而卒所以攘獫狁平淮夷者以吉甫張仲之徒相與復文武之業故也孝宣雖號綜核名實而卒所以熙甘露神爵之化者以魏相舉文景武宣故事故也然則為今之輔相尚何待而不為哉諸生試言其所當先者求以復諸上焉

第四

問王迹熄於不競之晚周而春秋作本末十二公始終二百四十有二年紐絕綱障橫流抗於一王之法推之乎三代之上至矣其書則存乎說理其義則存乎推見至隱其聳善而抑惡則雖斷編缺簡零落之餘華袞之休鈇鉞之慘凜乎其如長在也是仲舒歆向之徒用以考災異則雖猶撻鼓以須聲而不疑之按姦不過取諸蒯聵之事而足耳故曰不知春秋者守經事而不知其宜遭變事而不知其權豈虛云哉運丁神考自我作古

置官師揚俊傑使之應吾時求者非經無須也而春秋  
不預焉彼為士者亦以是書為無預吾事則徃徃撫衷  
高謝不復省錄曾不如諸子之釀細文該近趣者時見  
採掇也且春秋以經則居正以本則本之聖人其未暇  
及之也寧得以為無謂乎豈以始學者本之以詩書智  
不足以逮此歟亦以時無啖助未可使之昌言歟將三  
傳已自有得不復以遺後人則莫若姑置歟左氏傳歷  
漢數世不列學官晚見好於劉歆乃始盛行然聖人之

經非復左傳比也今也舉而明之殆其時乎二三子試語我乎嵯略

第五

問悠然來汎然受施施焉而昵以私遂至卷結轍而戶摩肩誠天下之所公患者此前日禁謁謁禁之科所以不得已而設也揭榜當戶者不知凡幾所跋踰卒歲者不知凡幾人上自相府下逮守令與夫米鹽筦榷之微一切檢以限劑畏事者至號其法為拘文謝故舊如貌

爾之塗人弛慶弔為不切之小謹卒然相遭未暇轉盼  
已如傷禽之驚虛矣夫宰相為天子求士宜莫親焉躬  
吐握之勞則聞之周公矣關是相閣則聞之平津矣今  
也何獨與之殊乎至於守令則又使客之禮不可一日  
廢焉者也奈何其泥之哉或曰禁謁謁禁是非壅人而  
絕之將公天下疎戚而一之也夫何病或曰三代直道  
而行禹稷臯陶相汲引而不為比周則公疎戚而一之  
孰大乎是且前日朝廷柄用二三大臣有不便輒弛以

利人則天下喁喁寬簡之秋也彼禁謁謁禁意殆將革之乎若曰事固不爾則謹以遲諸生之告焉可也

第六

問久矣醫之不可廢於天下也洪範六極凶短折預居一焉而周官疾醫掌養萬民之疾病以五味五穀五藥養其病以五氣五聲五色眡其死生兩之以九竅之變參之以九藏之動雖其苛細之皮膚若不足治而祝藥劑殺之齊猶掌諸瘍醫則所以俟民者亦以盡矣上古之

俞跗中世之秦越人春秋之和緩與夫漢倉公魏華陀  
之徒或激怒蠲痼或湔浣胃腎或處以法度毋得輒更  
或為五分之熨八減之齊以摩按調餌之所至無不立  
愈者何其神哉末世之醫至乃弊神於刀圭剗思於肘  
書砥數寸之芒操盈粒之炷自以為岐伯鬼臾區復出  
而曾不知起仆肉枯之妙正在何許療治之効纔十二  
三而斃者已過半矣古人求醫必於三折肱之家厥有  
意哉我朝張彼壽域一躋舍生上而京師則有翰林尚

藥醫學之徒妙手揮斤下而郡國則醫博助教時出砭  
劑以振綿悞惠至厚也向急售淺中者或搖於末利或  
窘於故步高駟大奴輝駭委巷甚者一發囊之頃而隨  
手規贖又况其術初不善耶今欲如周官歲終則稽其  
醫事以制其食而上下之與夫死生則各書其所以入  
於醫師然則所謂制其食者當以何道書死生定如何  
也願聞其略

第七

問聖人沒中國晚乃有佛而凡先王留迹以接麤者始  
不競矣佛之說曰無始以來誰頓愛纏淪苦海者彼惟  
不知最勝法中有無上果可以證人可以超方而方復  
羈嬰滯念執着妄緣浪與腐朽俱化是誰之過歟於是  
出其所以為人者而悉得解脫者一切界之號教外別  
傳至以有生為西兒以為證是則成佛反是則轉徙多  
劫佛之說如此其徒之從事於佛者亦不過曰如此夫  
佛與其徒正自不得不爾何預世俗而近世好事者至

乃假此以售進取名則儒也糠粃堯舜蒿矢曾史有問  
焉者曰佛之語則然行則儒也充腸以稗飯掛體以番  
衣有問焉者曰佛之教則然燥吻捷給是東方所號隱  
語者也自謂為禪酣瞑一榻是宰予之無事者也自謂  
為定禮義之冠冕指為當身之桎梏天屬之子姓視為  
生外之長物示奇則飾怪語以等倡頌矜博則標子注  
以蕪貝葉察其機械小數初在肝膈之上錐刀之末而  
徑欲馳四無礙辯擅六波羅蜜亦可謂不量力矣彼其

有得者果若是乎孟子曰一鄉皆稱原人焉無所往而  
不為原人而孔子惡似是而非者嗟夫儒者之弊一至  
於此諸生其束喙乎

雜著

海門按田書陸瓊橋壁

淮海人謂水南貫而順下曰涇若顧凌涇六丈涇是也  
謂始別而卒并曰泔若黃泔是也謂挾水所奔注使泛  
且不漫曰夾若鱸魚夾鑊沙夾是也溝則取其駢驪一  
作

雜列若匝舍然故有新溝

京本有港字

則以其滴滴如人之赴

委巷故有曹稍

京本作稍

港貼四達而平者也沙全以蠹

一作

介

立聽

一作耐

齧蝕者也符括農民耕且使有名者也沾

土之絕海

京本作溝

而遠於中者也段某有某土而限爾疆

此界者也塗澱而起者

音揉

淫而下者醱潄烏鹵者退灘

殖且漩

京本作函

漫不任墝者而捍環田若舍以却水者也

元豐六年秋九月余按田始得黃泚愛其寬平博衍

一作

愛其沃甚

以謂雖使注濁涇其中求沃

一作侈

於是弗能也道

旁見犂田

一作稻科

洒洒如攢指問土人皆曰此稻之最良

者民築場焉

一作有場焉

積秬

一作藁

如坻建小窳其旁自謂

囹圄

一作旁

率羈狗棲人使盜

一作衛

至終夕役作不休

少怠則繼之以歌呼為踏場相舂者無間

京本作間

童

一作兒

媪悉和也其白晝相追逐鼓歌相期會遣巫下神間遺

米圃

一作小

兒徼祈賽福翁若客操雞髀潰蟹醢列置中

求酒家往飲啗醉者或仆卧塋間或袒跣作指儲胥

一作

所儲曰吾醉鄉物也

一作吾醉資也

其衍樂盤

一作衍樂易

如此蓋惡

歲之幸民也

一作故余按視  
不敢食頃弛也

明日抵顧凌涇按劉孫旺

十二人號海塗者最題楊王廟壁又明日按王守明段

鳩袁瓊等六輩覆視前所驗槁苗懼竅於實也又明日

背飛壠越新羅貼過坊之為

一作在

東下沙者少前濟丈

涇抵蔣泝蔣泝少通

一作善

道埤中絕如決蛇眴潮汐去

來

一作潮  
頭狂奔

比他處尤險澁者也李善璫左素三瘠田在

焉已而望東沾求陳楊符故登醎水埤絕處悼仁孝村

逃者不復故

一作美

田為莽墟追念禹功愴恨

一作愴

者久

之暮宿陸瓊訪

一作訂

前路夷險是行也寧復有美田盡

如若者乎鼓歌相徵遂寧復盡向時之民乎道之險寧

復有險於蔣泚之東西者乎因壁之以告後按田者使

勿苟而已

一作它日吾將徵諸行却無因壁之以後語

### 書隱居王適中壁

吾友適中天資豪爽雖躑躅有司積稔而視世人猶呖也故論文則拔牙角商詩則躋奧突頽俯千世爪掌萬微不冷汰而清不嘜齷而腴視之如汾鼎周鼓楚松越箭

不徒古韻高出而彌今益蕭洒也豈與風塵中物計勝負哉元祐庚午晦之前四日偉明試筆

書漢武帝故事後

撰人班周世出官次不他見故事中言儀君傳方朔術至今上元延中已百三十七歲元延成年號也則周者其成哀間人歟及其後言迎神說鬼神事與浮屠相類則予又疑後人託為之然其間敷叙精緻雖多誕謾不經要不與外戚郊祀志相表裏者蓋鮮以為非西漢人

文章不能予從里人王夔玉得是書因為之讐正非是  
十二三既傳之別本則輒以此本歸王而附所識周者  
元祐乙丑孟夏廬陵劉弇跋

刻劉宜翁五詩碑跋

一日有郵筒自羌南來抵余與李君英發者則前韶州  
太守吳興劉公所遺五詩也時仰山上首德親適班坐  
余謂李與親曰公詩語灑灑似從天仙中來其傳而在  
人間亦既多矣使讀之者不問其所從得必曰劉筆正

爾譬之水下千仞清壯峭潔可望而知也而此五詩者  
尤號孤唱不刻績而工非韻偶而律其懷舊徵新弔歎  
荒落方復蟋蟀悠悠之徒而與彼眺盼八極者相季孟  
則豈若遊仙步虛之作瀟神汰慮侘侘而後為至哉於  
是親決起蘄叩曰審爾願丐本乎子副諸豐珉相與好  
事者為私室侈如何余與李笑謂曰親乎哉尚詩為耶  
夫知好公詩而初不自好念與好之者同是真好矣吾  
等亦何復執惜遂探本書其後以畀之公節義人也當

官敢任大事則今所至自謂

京本作號

三茅翁者元祐三年

仲冬廬陵劉弇前暉閣跋

書楚辭後

茲本傳自廣陵董天民主通之靜海簿自云得之林公  
次中家次中得之子固所謂秘閣本者比模本十異四  
五予從天民求之十反不厭然後得而視竄字之在模  
本者與模本莫有而予注其旁者類不少則乃歸以其  
說為信然是則楚辭善本視天下宜不多有矣故余於

此本尤系志焉元豐四年秋九月中澣琅山識廬陵劉  
偉明

龍雲集卷二十九

欽定四庫全書

龍雲集卷三十

宋 劉弇 撰

疏文

興龍節開啓功德疏文

代洪帥熊  
伯通待制

右伏以曜靈契夢華渚發祥真人開載誕之期繇宇協  
延鴻之望况臣民社分寄章紱榮身生成

京本  
作平

靡佗禔

補何

京本  
作宜

有雖乾坤之造終始難報而臣子之願中外

則同奉十官

京本作歲

之觴目斷堯天之雲日考諸福之物

情深周雅之岡陵爰即梵宮仰祈覺蔭伏願皇帝陛下

鴻名載赫懿燦於昭一六合以宅中四三皇而觀妙域

躋品庶衣燕

京本作賜

高年無疆惟休永錫難老占南極之

星者一旁

京本作宜

增有爛之輝聞

京本作高

中嵩之呼者

京本作有

三更協後滋之數臣某等無任瞻天望聖祝頌激切之

至

又

右伏以瓜瓞綿休電虹誕聖龜鼎兆一人之慶葵藿傾  
四海之心而臣尸責熙辰饗榮外計範圍所至燭灌何  
功雖成物者洪造之難名而愛君者有生之共願指日  
下而長安方遠莫奉宸觴詠天保而南山不忘獨先祺  
筭庀徒開士徼福大京本作覺雄伏願皇帝陛下有截承祧  
於皇憲極性五帝之仁於堯舜迪四人之哲於商周星揭  
老人數超神筴且天地無情於芻狗補報終難苟雲雨  
或致於象龍感通斯畢臣某等無任云云

又代在州官

右伏以甲館延禧流虹誕聖躡獻歲發春之候兆乘乾  
出震之休葵藿知傾臣子敢後惟大雄之普覺

京本作現

緬

浩劫以播慈載欸紺宮仰祈祺

京本作洪

算伏願皇帝陛下

庭衢六合步武百王駿惠龐鴻寵綏戴履問塗而迷七  
聖後天而凋三光應飛五之龍廣燕謀於下武探得一  
之策邁慶祝於華封臣某等無任云云

又代西衙侍禁

右伏以天命集而前緒光德水清而真龍降千齡啓運  
萬寶延禧况臣身荷寵榮屬聯姻婭雖難報者聖神之  
天造而知傾者臣子之葵心爰歎覺慈仰祈祺筭伏願  
皇帝陛下六龍邁震兩作前離隆不拔之丕基耀無前  
之懿鑠星輝南極呼契中嵩無疆惟休已慶京本作聽謳歌  
之歸啓以莫不庶更資富壽於祝堯臣無任云云

坤成節開啓功德疏文

代熊待制

右伏以洞庭汎而木葉下一氣驚秋黃河清而聖人生

千齡協契啓嬪虞之為汭兆興夏之塗山天壤蒸和華  
夷均慶不有覺慈之祈嚮孰資睿筭之龐鴻紛緇侶以  
趨蹌繹貝文之祇遽翕是百祥之降證茲五福之先庶  
期消埃有補淵嶽伏惟太皇太后陛下素舒闡教厚地  
敷方任姒之光大周家德盛而未嘗遭變馬鄧之維持  
漢室事叢而纔足解紛非如擁日東桑回春北陸措洪  
業於聲氣之弗動廣慈訓於謳歌之已歸而臣某猥殿  
外邦適逢令節沐雲天之普施欣草木之餘生建隼憑

熊千里尚留於楚尾獻芹傾藿三呼敢後於嵩高臣某  
等無任云云

又

右伏以萬物順成方應金行之序千齡集慶誕開文母  
之祥實惟夷夏之交欣更協神天之來相梵金布地曲  
致精嚴貝葉披文載陳悃款庶集上聖之善仰資有永  
之年伏惟太皇太后陛下德體坤元信膺天助宮闈正  
位飭陰教以修明宸扆聽朝散仁恩而覆露羣生悅豫

四海敕寧臣某等忝冒王官運逢令節物難論報但傾  
懇到之心美必思歸願頌絲延之壽臣某等無任云云

又

右伏以盛德在金玉宇快涼颼

京本作颼

之入皇天開聖璇

宮儲慶誕之休元雲布色以通霄

一作宵

太陰騰精而協

夢德均持載歡動幅員惟含齒戴髮方幸於閭希曾鼓  
腹擊壤不足以報稱自非款西來之最上何以佐南山  
之疾呼載繹貝文肅將蒲饌冀靈長之睿筭茲擁祐於

覺慈恭惟太皇太后陛下續女延鴻俁天錫羨雍容彤

管之法度增大軒星之輝光位正六宮協王

京本作關

睢之

詠周妣母儀三世

京本作四海

陋沙麓之興齊

京本作有

田

京本作商

壽域躋氓樂郊適衆有效珍之百物無失所之一夫臣  
某等令節親逢薄躬知幸居然傾藿空迷魏闕之思迹  
彼獻芹更效華封之祝臣某等無任云云

又代在州官

右伏以璇玉成宮星娥協金行之應元氣覆戶地維符

火德之祥序屆秋辰天開慶誕擁百靈而篤祐奄四履  
以煬和徧款能仁更資有永煥若禪局之金布闡然淨  
侶之雲臻哦貝字於珍函致蒲盂於香積俯傾葵懇上  
祝椿齡伏惟太皇太后陛下軒揚飛輝椒塗抗則負宸  
憑几之隆顧託奠枕覆盂以冒幅負式抃以嬉既安且  
治而又率循嘉祐之故事對越仁祖之闕休赫然隆名  
高彼夏古臣等幸緣天與節乃時逢且清明再造於乾  
坤雖形容而不得而喜慶預知於蛛鵲庶感通之可期

臣等無任云云

坤成節啓建功德疏文

代洪帥熊待制

右伏以配文嗣音太妣肇洽陽之福母堯成聖慶都儲  
斗野之休候爰屆於清秋節適臨於慶誕觀萬物之理  
皆知致養乎坤誦小雅之章敢不思報其上是用心先  
傾藿地款布金力資西鷺之覺慈仰祝南山之睿筭伏  
願太皇太后陛下無疆垂裕俾艾延鴻有開必先永錫  
難老清蹕而朝萬寓後天而週三光擁介祥祺億寧盛

世雖疊疊神明之顯相輔順當然而區區草木之微生  
投誠止此臣無任云云

又代衆官

右伏以雲容入戶一葉應天下之秋玉色覆衣萬世得  
聖人之遇天地之生成無以報華夷之鼓舞無一作莫不

同方屬葵傾敢祈芹獻上萬歲壽初遠於千官歸兩足  
尊莫先於百順伏願太皇太后陛下增光離照開大震  
塗未艾延禧無窮申筭動星躔之箕翼叢雅什之岡陵

大德之必得其名已餘曩古多益而以莫不庶更祝後  
天臣某等無任云云

祝文

代

謁文宣王文

惟天地之大萬物雖知不能報然無不報之萬物也夫  
子天地也顧區區薦奠何有哉亦誠而已矣某守藩之  
始方徼王之休以芘斯民取王之所以遺後世而無窮  
者以教學者則凡進謁祠下敢不式遵故常王其肆臨

之無替尚饗

謁袞國公文

惟公懿言行以開後學時用舍以同聖人視儀上公以  
食茲土某守藩之始典禮有在敢不舉以從事是用躬  
謁祠下庶其臨之尚饗

祭順濟龍王文

夫雲雨固王事也千里赤地凡神而食此土地宜愧之  
而王未暇及此豈太守咎耶謹用所以當告者待命祠

下惟王其利澤斯民毋忽尚饗

祭海神文

維年月日謹以清酌暇

京本作庶

脩之奠致祭於大海之神

曰海之在天地間醴百川使下赴且包焉而不拒也初  
無小大汙潔之辨紛萬族使蕃息冗長而吞吐蹢躅乎  
洞鴻漭瀆之濱也曾美惡之莫予間夫惟萬族也而無  
所間則宜亦不使一民或失其一作至所夫惟百川也  
而無所辨則宜亦不使一方之獨被其患間之往歲若

實憑怒弗循

京本作適

厥經漩瀾倒注奔鯨駭陸鼃鼃生釜

天吳馬銜蝸螻陽侯抃手舞歌颺母抗雠嚇鬚鬚千  
里悉湫斯民噉噉靡所控告彼膏者壤燿焉如掃豈伊  
民祀弗將弗虔豈伊沉礫曠廢歷年若譴若訶靡逭斯  
愆今令之來也實父母斯民而適繼其後實猥有此土  
以處而戚休是究實土毛生齒之弗靖為憂實賦輿貫  
粒之腐敗是疚實維霖霖懼或沛滂實維塹防未悉完  
構用迪悃誠將事許湄碩肥者牲肴羞孔時神若戾止

以妥以綏將若是使往者之汹涌妄行反而為今茲之  
利涉安流也將若是使往者之秘怪騰軒激射濤波反  
而為今茲之儲密宅幽也將若是使往者拔木飛屋不約  
之怒號反而為今茲冷風之疏和氣之游也將若是使往  
者霾昏不祥稷疇蔽虧充塞上下反而為今茲望舒之  
夕泛翔陽之朝浮也登餘波於上而揮蘇苗之早澤霽  
澄漪於下而為一作列瑞世之閔休長魚麇蚶民食夥稠  
鳥鹵淫夷下滲弗留京本作宇宙毋或顛隤摧檣傾舟毋或

潰

京本作漬

齧齧漫民疇毋使鋸牙劍尾乎搖毒毋使旱魃

螟螣乎肆殮毋怠乎其應毋愆乎其求其毋爽神之貺

其毋貽令

京本作神

之羞尚饗

祭王荊公文

代人

噫嗟公乎何為其然乎豈富貴迫而賢有智累乎將造

物者畀付

京本作賦

施予或膏或賸而羌不可以力騁乎抑

亦靈芝慶雲止為瑞物而固不免夫翕霍而散與濯濯

而萎者乎且從古以為難者莫甚於掃不振之蠱起久

仆之痿以與一世期

京本作斷

乎有成而甚者至使天子快

登平之適遭斯民無睚眦之斗駭非守能固其初力足以飭其後者能之乎然士或勇於有為而昧於知經求完乎此者不踦則躓而於斯時也有能爍傳注之秋燐探百聖乎虞淵偉然號為一家而使後世於此有攷者方自我作訓則可不謂睨聖人之閭而直躋者乎已而擲去事權一毛九牛凡此者人皆難之而公或以為易人皆偏焉而公可得而兼若公者其殆命世乎其有待

而未已者乎然則我尚何悲乎夫惟周袞旋待於公歸  
商霖更期於說作天下之有望於公者以此與夫識公  
於四十年之契闊而遇我如旦暮之頃訪公於千餘里  
之鍾山而輒申我以縞紵之好吾之有得於公者亦以  
此而厥望未償撫惠方爾一旦歸窀於漠漠之九原功  
業之及人者未能幾何而塊獨遺此平生則吾尚何可  
無悲乎噫嗟公乎庶其來舉予觴乎尚饗

又

嗚呼麟鳳儀游忤舞走飛傑立一世有公於茲江河取  
東吞吐源委滋物洗光非公而誰自古在昔革制實難  
睢盱回次衆所共患或拊而跳或諗而謹

京本作淮

及公有

為卒底於安久矣聖經理鬱弗通傳注披披帊覆帝蒙  
繇漢迄唐大陟厥宗及公有訓孰敢啁訐奎輝不揚歲

我文造冗長戚促孰訂孰攷朱藍等妍鏤句雕藻

京本作鏤

句雜藻

及公有作靈翳一掃始公熙寧實舟蕃錫大賚天

子是優著蔡國經天子是諏人謂公進說商旦周公熙

寧季以位告去孰視富貴擲如遺屨我徂東阡甕牖蓬  
戶人謂公退留侯疎傅嗟嗟我公今則已矣來軫孔道  
未稅先柅壽則大嗇及中斯止平生磊砢尚可僂指曩  
予晚遭公力是藉方公長往余弔莫暇音徽永沫碎影  
何謝長跼薦辭播哀修夜尚饗

祭鄒通直文

嗚呼誰非豐財稽德則匱君裕於德而不財愧爵以恩  
叙莫能生存君侈於福生以爵聞孰昌其生孰嗇其齒

彌百之年及中斯止麻源之北章水之東有翩歸旒髣髴音容人之當然大變曰死足慰無窮是惟有子嗚呼哀哉伏惟尚饗

祭王夫人文 三首

嗚呼人治之大內則閨闈視古無愧亦有成烈柔閑靜莊是訓是服粹完弗渝惟夫人之淑熙如春暉字弱撫嫠中外怡愉惟夫人之慈有子材賢震赫家聲龜組侍傍惟夫人之榮終始一德惟琬惟琰凡弗能者宜夫人

兼百齡飄驟至比隙駒八十於茲誰夫人如丹旄有翩  
指日徂南薄駸薦辭庶其無慙尚饗

又


伊死生之大變如索綯之糾紛拾永年而歸全斯足矣  
而何言懿夫人之閱世宜家而淑溫成夫子於飲助  
迪終吉而純純粵平時之里閨爭挹蠲而取芬如聯章  
而駢組鬱焜燿其閭門方視古以騁烈豈長訣之足泯  
瞰閩山之嵯峨指歸途乎窅窅遞哀音於素飈綴戚嗟

於路人跼陳辭而一酸庶髣髴而臨存尚饗

又

猗歟夫人王宗是媚如裏斯褊裕我中饋亦有就德靜  
專柔懿亦有侈慶厥紹昆裔婦順母儀終譽來暨播粹  
里閭不能者愧人生孔艱十五夭瘁天不嗇年而夫人  
畀舉世患苦衰落凋替紳綏聯聯夫人門地昔孟母賢  
實惟訓子其間寂寥今則高視裁裁閩山竈藏是啓指  
期斯復式筵式几靡誠弗將亦職惟吏矢辭侑觴尚其

臨止尚饗



龍雲集卷三十

欽定四庫全書

集部

龍雲集

卷三十一  
附錄

詳校官庶吉士臣吳烜

侍讀臣孫球覆勘

總校官進士臣朱鈐

校對官中書臣王學海

謄錄監生臣曹躍淵

欽定四庫全書

龍雲集卷三十一

宋 劉卬 撰

墓誌銘上

墓表附

高士何君墓誌銘

上嗣位之始詔中外得言事未幾四方章翰登聞日以  
百數天子仁聖幸加惠臣庶諸誕謾亡益於治體報罷  
貸弗按而其間剴切世務赫然號能建明者錄用如治

平四年詔書是時以言起徒步自太學生何大正始大  
正自言始吾毀齒而亂吾父不轉之南畝而坐之門側  
之塾期我學也及束髮而弁也夕去吾孺子而朝伍之  
成人期我躬行也遺我如此與財孰多又曰方吾父棄  
養惟不肖嗣人不克立不能侈大窀穸事使親客淺土  
萬死不償責今者南歸幸蒙天子厚恩遷奉適其時宜  
得銘播幽用追補前儉陋失先生始嘗腆遇我且有文  
敢以謁弇曰是則我不可以不銘君諱受字持謙姓何

氏世居陳留太平興國中有出為韶之仁化令卒官因家焉者於君為四代祖王大父諱世隆王父諱選考諱真江嶺間俗神地理而王父善讀青囊書間語術家曰試為我求靈澗福岑益光大吾後者不議費術家曰有是在南安之橫浦驗如言卒徙居之故君遂為南安人自仁化後三世不仕而君好學略通大義不類他隱者偕高士名以文撼有司一不契投筆硯絕口不言進取少時侃侃自將孝行高里中族姻有弗槩於理必引以

歸正雅不治產然喜施雖隱約斥財振人益力笑未嘗  
壞顏人有干非其意不為動間讀莊周書曰快人何恨  
疑作限 吾送老資也晚嗜泉石推知勝處幅巾芒屨勇往

不疑里中歲時擊羊豕上冢坐社衆得君乃歡雖雞黍  
為具或閣匕筋須君至乃舉而君亦悠然徑赴未始失  
意一人太夫人年九十尚無恙君於是六十有四矣白  
髮婆娑奉旨甘契節適親亦對之歡然有壯子孫愧弗  
及者内外艱幾滅性更外除柴甚猶不御酒肉人以為

難元豐四年十月疾終於家壽七十有六娶楊氏再娶  
劉氏皆前君終四男子如珪如璋敏求大正大正賜進  
士出身宿州司理參軍初大正游太學無來資敏求曰  
無苦吾繪事當可辦因俱留京師十六年竟就其第女  
子四人皆已適孫男二人曾孫二人建中靖國元年二  
月二十九日辛酉舉劉夫人合葬君於大庾縣玉池之  
原君長於大小篆傳神山水得意處自成一家嘗評李  
斯陽冰篆如嚴諸侯助祭凜凜不見跛倚見闔立本凌

烟功臣像王維輞川圖曰元子去世誰復識常山蛇形  
蓋以自況云何氏系出武王子叔虞其後十一世曰萬  
食采於韓春秋傳所謂邗晉應韓者也秦并韓子孫散  
處陳楚間習訛音謂韓為何故有何氏銘曰

噫新居清束秀儲固護而發舒噫若德有蔚其特衍  
施而厖碩斯祉斯賁覃我昆來其尚多乎哉

居士王君墓誌銘

紹聖三年夏五月二十九日居士王君以疾終於其家

之正寢既卒哭矣其孤廷彥書謂弇曰天以釁禍酷吾家諸孤置弗譴而鍾吾考吾人雖相與抽摧殞泯顧萬萬無益逝者獨求世之名能文者誌銘墓傍尚裨信且有攷此其為終天慰何限敢狀以告弇於王氏實元豐同年進士又嘗獲拜居士君則所以欵識之是無易我者維太原之王系自仙人子晉其後顯者間出有以戶部侍郎終郭周時曰朴者於君為五世祖宋有天下侍郎之支子始徙江西之廬陵遂為廬陵人君諱九疇字

建中曾大父諫大父邈考堯逮君四世不仕而君尤以  
隱德高鄉閭方尚少資警敏已如成人加壯而端毅沉  
默雅不喜設飾平居退然若不預事及事至求辨揣機  
括立發取無負類智數者而不恃也事親以孝聞母夫  
人屬疾彌年醫藥護視未嘗輒去左右至廢寢與食迄  
其終無少哀者皇考之喪會君在道及訃聞一慟幾絕  
其後嘗以為終身之戚時號慕隣里為之感動先是朝  
士恩他姓子以後已者加長矣晚更得子則寢欲奪愛

斥之取謀於君君曰恩之誠若妨嫡正使不為嫡妨則  
是子去將焉適奈何忽欲為忍人事耶朝士愧而止聞  
者義之嘗浮洞庭會天暴風人有以舟墊湖波中丐援  
溺聲甚力更數舟皆奪氣睜眙自脫引去獨君奚疑危  
赴急視飜濤若平地或止之曰俱死無益君曰使我援  
彼而死亦命也賴以獲免者數人其仁心類如此始君  
頗亦有志書史間晚為生事奪去緒業不卒而一時交  
游皆君子長者遂以問學啓訓諸子至躬自督約嘗曰

吾其斥大門閭須吾兒車蓋容入耳他非所冀也自宣  
義登第君益得自放家事一以委能子時時從釋老之  
高躅者遺累捐縛等夷死生要使身世無毫髮恨急人  
之病如救災灼里之爭辨者不以干吏而以不得直於  
君為慊初君不嗜酒然客嘗滿門人人皆得其歡嗟夫  
雖古所謂仕焉而已歸教其鄉里者亦無以加此壽七  
十有五娶蕭氏子男三人曰廷堅曰廷彥宣義郎知江  
州湖口縣事曰廷老有文學累薦舉女二人適呂仲元孫

慎徽孫男七人孫女二人皆幼以十二月庚申葬於儒  
行鄉仙桂里三合之原銘曰

前乎此流澤則長後乎此益闡以光有攸者德而斯允  
斯臧亦奕新阡既協吉良有徵者是為王姓安安之藏

劉伯景墓誌銘

伯景別余之一年補賀州富川尉又二年而訃至豫章

余哭之如古所謂哭朋友

京本有者字

最後得其臨終數百

言曰吾疾勢憤憤冀少日有瘳而自頃來殆不可力青

衫黃墟此自吾分不可

京本作決不

復作兒女悲

京本作態

但生

平百不一究吾蘊萬不一償吾志後當有為我不平於造物者必徵信筆使我沒齒無滯懣淹恚將非子耶嗟夫君之寄聲我其有以也夫是則前期哀次論列附銘左方宜無愧君姓劉氏諱戩字伯景吉州之安成人曾祖義總祖文爽考俊皆業儒蓋不仕者數世而至君考益以時譽高諸劉晚復不偶既而語兒曰得志固不在吾兒乎無為久憊場屋即盡取其所藏書數千卷遺君

使讀君以七歲聯其父詩亟有忠孝語聞者咨尚號里中奇童及就塾經目成誦日數千餘言至撓旁兒書孰之示有餘敏壯歲諸書蓋無所不讀能不違

京本作苟

於去

取始讀前漢書萬石君傳慨然撫衷曰真得師矣至汲黯則曰與人意闇同他日視舍辟攬筆大染曰萬石君是吾師也汲長孺豈欺我哉時以為名言性樂易不事詭激甘肫非出自其已不以饌親丁內外艱柴甚幾至減性歲時典

京本作展

祀悲哽若新有喪者雅不喜治生視

貫粒空匱裕如也與人交初時微泛會不可意決不復  
噂噂相取附客至一室蕭然焚香酌醴取適而已曰吾  
敢以樂怡憂乎閭里慶弔夙而

二字京本作必

先曰雖微我人

其忽諸先是里豪有伯仲議睽居知君有信義相與持  
籍從決之陰約君曰誠使我得善壤願效奇貨君笑謂  
曰子欲以是疚我耶卒謝絕言者愧歎以策試禮部第  
元豐末進士特奏名釋褐假承務郎初君弱冠旅貢士  
遊京師一時士大夫爭傾蓋推轂期以膺仕而施厚得

將肆復蹟者迨三紀晚收

京本作取

一官而君白首矣及

之官富川事巨細悉力審處遇煩拏立辦無留敏有弗便徐為剖決引誠忼慨言毅質仁大吏以此多之疾之

日太守鄧侯飛書官舍問狀所以勞良苦勉醫藥甚至語家人曰侯誠惻我無量但屬不應得此疾雖革永訣

語尚可料理復索紙作書僅成擲筆而終鄧侯得之愕

且痛

京本作慟

曰天奈何奪我佳吏乎年五十七諸孤護君

喪歸塋順安鄉厚山新塘之原娶王氏前君謝世再娶

黃氏子男五人公度公量公肅公偁公顯今為名進士  
女二人適進士歐陽燮許世延孫男三人大受大成大  
順孫女六人尚少有

京本有詩賦字

文集三十卷號無聞集藏

於家始君無恙時有仙女來自臨賀自謂陳仙嬌仙當  
下時不復形聲數漫粉壁畫字書自見作詩遺人多禍  
福意初雖隱後畧無不驗者嘗從丐詩得四十字有青  
天蓋遠山黃河流白水語人皆賀君得吉贈君既疾始  
怪

京本作悟

其語曰青天蓋遠山千里歸塋象也白水於文

為泉合上黃字為黃泉死徵也嘻陳仙命之矣尚何逃  
乎已而果然又貢士劉瑗君髻年時里中友也有斷金  
契君補富川而未赴也一夕夢與劉方轡從以輜車若  
取道之官者他日以語劉劉戲應君曰復使曳方袍從  
君後乎夢不閱歲而君終君終之一月而劉死矣其精  
神京本作誠所契如此君別余以元豐八年七月之十日終  
以元祐三年十月之十四日塋以明年十二月之十六  
日云銘曰

材則長得胡嗇南圖收西崦迫誰執咎莽難測厚山陽  
厝真宅厥有子可無戚

鄧夫人墓誌銘

有懿行女子從其夫之官元祐八年二月二十有一日  
以疾暴終於莆陽司理參軍之官舍者曰鄧夫人世為  
南劍州沙縣著姓父硯有隱德母曹氏姜氏而夫人則  
曹出也生二十有五歸同郡陳君全始夫人少時子之  
者裕於為親及歸陳宗婦之者安於為舅姑而夫若子

初若不計其慈順既而亶然有聞則中外族姻至有力  
循疾放而弗逮者資淑柔靚莊所以督約其身甚備平  
居無隋容不妄笑語不以家有無累其夫然夫亦以此  
取辦其加於人一等每如此謂陳氏斥大方未艾而奪  
之年使不克遂其志之思以歿天之戾乎人其亟哉壽  
三十有一二女子於是莆陽君謂弇曰歲十有二月十  
一日甲寅於辰則良得故鄉之北阡於兆則吉圖吾妻  
之窀穸於是法宜得誌敢以諉子嗟夫弇陳執也義不

得默是則誌夫人且詞以哀之無若我者詞曰

夫何天之不淑若人兮禍忽趾乎福先變索綯以膠蔓  
兮一瞬泯其百年揜蛾眉之脩嫵兮闕鬢髮之連娟痛  
未朝而晞露兮奄先秋而摧蘭佩璆然如鏘鳴兮衣霞  
帔而馭舉蹇淹留乎下泉兮曾不以夫子之故神濯濯  
而長蛻兮形膠膠而弗寤愀總帷之寂寥兮邈生平之  
笑語邁幽宮兮莽不追睇龍津兮還翼疑作資羌敦吉  
兮寓恫悲鋪懿鑠兮視吾辭

歐陽文叟墓誌銘

弇紹聖丁丑舟而北也文叟疾良已過之訣語弇曰老  
不貸我脾腎舛且弱間得上浮中乾之病在法茲謂土  
不勝水肥醲甘脆仇敵我而燥石腐梗以劑名者反若  
子弟之左右侍也凝泣焚煎礲胃戟腸又數得醜夢決  
不久客人世且脩短自吾分獨平生隨手磨滅念之令  
人不置片石揭幽知我且文則子在他日誠不能無萬  
一冀弇驚謂曰無苦君會當有健時奈何驟作不祥語

是冬疾復作明年六月乙酉果不起其孤自廬陵走一介以書來京師請銘曰茲吾父志丈人謂何於是為攷次致政蕭侯元卿所為狀泣且叙曰君姓歐陽諱通文叟其字也世居吉州之廬陵為右姓曾祖諱壽祖諱鵬考諱居簡皆不仕君開爽樂易少時炳炳類夙成者就塾日課書千言塾中兒皆出其下生九年而孤逮事皇考而弗得則取其尤篤者孝其母夫人弟其兄監簿君又二十年而長其家復取竭於其母兄為未已者友其

弟慈其諸幼於是閭里翕然難君所為既稱慕之則間  
又愧其不及熙寧中天子黜浮靡始詔取士本經術異  
時廬陵應書幾三千人雖盡斥故習然猶窘成說場屋  
成筭莫適主而君獨晏然類無事者一出輒上列聲譽  
益籍甚明年禮部報罷歸則盡出家所藏書千餘卷羅  
諸庭曰是豈不足娛老何至從少年計校後先掠場屋  
美耶即又與其配京本作妻約曰歲時祭享我則不可使菲  
不繼伏臘醫藥男若女婚嫁凡若干中外親戚慶弔問

遺凡若干費則有程矣餘悉付饗奴使我得盡意賓客  
無留為也居喜客雖出天性至不可得而親塹限崖設  
不少貶降以是門無雜賓所與遊皆一時士大夫晚度  
舍西南地築愚堂居之自號逸翁時時杖屨還往賦詩  
壺奕撥置世故取自放盃酒間戶外過京本有從字客絡繹  
不厭也其達如此今夫利徒風舶雨轄逐什一乾沒走  
貪死貨長年無須臾閒愚也孰與深居嗇出泰而家者  
仕宦者卒然相遭必顰呻更弔唁縛羈勒繩墨食不及

一作或不

下咽投老決去就反不忍以蒼瞞易朱紫惑也孰

與食先疇無愧色者之二人者固得矣而胥失也文叟

生不為

京本無此字

世用間取則多固失矣而獨得也嗟夫

此其為無負歟壽五十有九明年冬十一月乙酉薨君

儒行鄉潯源龍坡埕娶劉氏男子三人曰伯虎則請銘

者也舉進士有文學曰叔豹曰仲熊尚幼女子二人長

適南安軍司法參軍蕭世礪次許嫁王氏未行文集十

五卷藏於家初君之隱也今給事中范公鏜過其家留

詩道舊繼而作者甚衆通守徐君常校理盛君次仲皆以文高君行而又嘗記愚堂者弇也銘曰

涇吞渭滌如命何惟其自視不媿要闔茸暢轂珮玉瑳  
哲謀肅乂辱詆訶從古已然尚胡嗟烏黔鵠白寄一呵  
塞竇收影六籍哦其孰榮盛孰坎軻末年齋志在澗阿  
以此易彼得孰多嗟吾文叟嶷且和壽弗克究理則那  
惟名與實不滅磨視吾銘詩尚無訛

蕭孝廉墓表

熙寧四年夏四月丙子有宋篤行君子蕭君以疾終身  
是歲冬十月甲寅得縣之儒行鄉留陂原以葬而後二  
十有二年壬申之六月其孤公厥之游劉弇實表其墓  
君諱汝為字叔展吉州廬陵人警敏莊裕子親弟長慈  
下而睦疎已自其兒時有聞而加長則寢以文學見稱  
於伯父御史公每曰是兒必張蕭宗君讀書取大體不  
謏謏寔章句喜讀西漢書會得意卷彌日不去手為文  
若陰與筆計語千百抽楮立就奔壯卓詭初不自收束

徐則宿理蓋矗如也剡方揉圓略不露斧鋸痕跡其工如是於是人謂君方將芻飛黃騁長道脫驂解服蹂蹴燕越取萬里寄一躍中意弗蹶其在此曾不中道而適得蹶焉則咈哉天其不卒於畀材而戾之亟奪之果也先是歐陽文忠公過七里院得君所為記龕壁間者讀數四不釋曰筆助疑高古作者正如是矣其題四明奉化之浮屠壁也至謂短綸不釣深弱弓不中遠張賦科蒐廊廟材疎矣丞相荆國王公時為縣於鄞一見以為

得當世利疚意君於詞賦絕人遠甚然居常薄之異時  
廬陵號天下士區應書者紛以千數有司幕處操鑿枘  
契圓方索來者氣君坐囂謹中題經目無巨細即一揮  
有司輒稱善以故連三冠多士廬陵至今號青錢解元  
以方張文成云君貌瑰整望之嶷然若不可親人相與  
處久益不忍釋去雅疎財京本作賂所至不計貲寡多應手  
一空雖大敵弗靳也急人危難若出自其已士從學嘗  
數百人悉得其所欲晚益巉嶮間語人曰古所謂正可

坐之丘壑中者非我謂耶舍旁近有溪因命曰潛溪即卜築其上自謂潛室琴書杖屨自副若無預茲世者熙寧初天子起有道士逸田野間者衆謂君曰盍應諸即件名舉君孝廉郡守以聞而君死矣享年四十有九娶楊氏三男子公望公球公厰四女子皆配仕族有集三十餘卷藏於家蕭氏故長沙人廣順中有以馬氏亂徙居江西之廬陵自諱儼者始於君為遠祖至六世諱定基者始起家為材御史與君皆出自曾大父諱渙而諱

良輔故贈尚書工部員外郎者於君為大父諱化基故  
虔州贛縣主簿者於君為考自君以學行高鄉閭蕭氏  
世益大成材者相踵云余哀君以彼其身卒侘傺不遇  
以死也於是系以辭曰

謂獨君嗇兮羌孰得而材之謂獨君侈兮胡反脩齡以  
促期眇莽冥默兮孰職孰尸曾不懟夫造物兮彼死生  
亦奚以議為嗟嗟孝廉兮有赫厥輝殷考彙以宅粹兮  
噤不得施世故飄驟兮放乎一歸顧有以遺其嗣人兮

負煜燭以歲蕤得未為贖兮失非所羸播辭隧陽兮是  
母可悲

龍雲集卷三十一

欽定四庫全書

龍雲集卷三十二

宋 劉弇 撰

墓誌銘下

碑附

王君章墓誌銘

熙寧中君章子從余游因抵書往問安否恨不及邂逅  
相與締一日之雅以謂徒咫尺居不知幾何時能相即也  
既而君章報至悃辭闊幅虔若引退者之臨顯人因撫

書自慰曰吾雖未及見已知其為長厚人矣越明年道過吉水因踵其家而君章適與其子皆在問勞甫畢即握手把酒引滿歷歷語過眼事若當疑故知已然殊相歡也又明年余將赴試禮部而忽有以君章訃聞者始而驚中而疑且信曰孰為君章而止是耶彼痼者之與癯而弱者惟不能時飢飽完守京本作寸氣病乏相攻乘不在腎腸在膚腠甚者或內癘發熱以至精液漸京本作斷涸垂終以待盡死無足怪也吾始見君章時齒方剽剛吐

言丞丞體豐碩而氣浩博以為偕使冒犯寒暑凌衝風  
濡曉露猶得為無恙人奈何一跌不救遂至於此是可無  
悲也夫君章其字也姓王氏名袞曾祖諱昇祖諱澄父  
諱律方君少時已有老成志雖與兒童相遨嬉未嘗妄  
發及壯尤慤愿事親盡孝道視其貌初無崖岸邊幅即  
之蓋敦如也始嘗用詩賦進取為交游所推致連三試  
無所遇而會朝廷更科因操其所為文悉焚去而更習  
經義又兩試不得志人或疑其廢罷君獨以謂士守死

善道得時不得時正在斯須間耳顧吾所好者何如坎  
壈不足道也尋復欲應書而以祖母服不得就既而君  
之父卧疾寢革家人惶怛忽忽不知所為君因密禱於  
神願減已筭以起親疾一昔拜下至忘去寢食而君之  
父果京本有愈方且以為有助而君以驚憂得疾矣將  
終家人環而泣之曰寧復有遺憾耶君徐曰吾平生潔  
廉慎重絲衣粒食無不可意者獨恨親已老惟是甘旨  
滫髓之養不可無壯子弟在傍今也一至於此正恐死

無塞責耳言訖而終時元豐元年戊午九月十八日己丑  
也享年四十有二娶高氏子男三人居方居實應進士舉  
居玉尚幼葬君於吉水縣仁壽鄉萬安里鶴卯洲者明年十  
一月二十日甲申也嗚呼件其事以播諸幽是誠在我銘曰  
紛萬類兮莽不齊宵翕忽兮更驟馳生聚氣兮孰使為  
死一跌兮尚誰尸猗君章兮焜陸離齒方剛兮志倏違壽  
胡嗇兮邈難追慶貽後兮理則宜揆幽宅兮歸有期綿永  
久兮存銘辭

王公權墓誌銘

王氏世居臨川其後有徙居於廬陵之吉水者曰俊於君為五代祖自俊至君中間皆不仕而王氏遂以富貴號大族方君少時已能從學在交游中若將果於自奮已而寢為事奪志卒不就因聚家藏書指以遺諸子曰孰使為此而不可得者非命耶於是更留意治產不為橫費以撓生事先疇所入輒取其贏餘為歉歲備儲蓄寢廣雖家人輩有弗知其寡多者居無幾何遂以富擅

間里貲產至數萬計熙寧中歲大旱民間穀皆前此費  
去而君家廩庾相望所至皆完實客有謂君曰乘時之  
急以牟大利舍此不為其孰為者君應之曰且誰非食  
以為生而使吾坐視殍殍為自安計又幸其乏時以取  
倍售誠不忍為也於是悉發所藏穀為平其直不當價  
之十七八遠近賴以活者數萬人縣有學舍湫隘弗緝  
至棟宇敗撓至十數歲無省視者君為白官出私錢十  
萬與里之仕進者同首其勸學遂以成異時有恃君長

者為可犯者數出詆欺且欲因有所求以為君初殊無計較也至則悉為披露底裏使無能出意外既屈伏轉以好語謝去人以是多益畏愛之君為人寬徐和裕善自整持平時似不能言者及遇事一發決無有退轉意自少年已知生計未易就及晚年反更豁達喜施與親賓過從每張具惟其可者無不為也遇人有禮尤以誠信自許居家無小大一際之以和未嘗鞭訶童奴尤喜勉子孫以學至躬自督視恐不得當其意元豐元年夏

君偶得疾既而小愈秋疾復作諸孫方就試鄉有司亟欲馳歸以侍而君逆使止之為萬萬無廢進取吾疾會當有愈時何歸也其急善如此先是君居母夫人喪既數月矣方在哀戚中而長子繼卒念偶失壯子在傍相與併力當後事因摧傷感慨疾遂大作竟以其年冬十有二月三十日終於家享年六十有一君諱律字公權曾祖敞祖昇父澄娶胡氏子男二人哀先君三月而卒次曰中孚女一人適里人魯國尹早卒孫六人居方居

實居正居易居安安止曾孫三人長曰無悔餘尚幼中孚居  
方居實皆應進士舉以明年十一月二十一日乙酉葬君於  
吉水縣仁壽鄉萬安里安國山之王秋原將葬其孤中孚  
前期踵書謂余曰惟是先君善狀將子辱也其無辭銘曰  
不獨臧厥身亦有以遺其後嗚呼王君孰謂無得兮斯  
可以為壽

沖厚居士劉君墓誌銘

劉氏之裔其來遠矣至晉劉遐為安成太守子孫世居

馬為甲族有令望園冠而為儒者十常八九遭五代創攘之亂變名拉族毀迹避難史失其傳而無所於考吾先乃隱居於龍雲下村之陽至伯父斯數世矣伯父諱贄字叔獻雖非儒者然為性厚重尤疎於財其發言論不事修飾而類多中理雖宗工宿學徃徃有不能及者時之聞人皆以沖厚居士稱之議者咸以為實錄焉叔父少亡伯父與諸季父皆幼伯父事吾祖以恭而成諸季以義至於以恩撫宗族以禮接里人其尊卑上下皆

恂恂而不失其序愷悌仁厚之風藹然於鄉時之老成  
教其子弟孝友恭謹禮讓而溫仁必以伯父為法曰為  
人如劉公足矣鄉人有爭訟之不平者不聽有司之令  
而聽伯父之一言犯有司之刑不以為恥而以不得於  
伯父為愧嗚呼伯父之居是鄉非有政令以驅人之從  
已而能至於若是者殆古人所謂行之以躬不言而信  
者歟雖然此特伯父處已有如此者若其以詩書教子  
以禮義成家選道德之學為聚於里中士至於貧而不

能以自給者悉有以饋之縱過逢亦必燕留晷月及謝去隨其緩急戚疎咸有以濟之由是英俊多歸焉而戶外之屨常滿矣雖朝士大夫亦嗟美稱頌至為之交者簡書通問遞不絕傳此伯父之得於人者又如此則其謂之冲厚也豈虛言哉雅不嗜酒每遇賓客列席張具笑談委曲客不醉不止人皆歎其至誠而不倦也元豐四年八月五日以疾卒於家享年六十有八其年冬十有二月某日葬於本鄉灣潭之官山娶彭氏次娶陳氏皆

大族子四人逢邀若缺若中若缺嘗預薦名女四人男  
孫七人女孫四人曾男孫二人噫伯父之子孫可謂盛  
矣其不仕者則克家有立而從學者皆才器雄偉名聞  
於時而吾宗之大未易量也惜乎伯父不見其子之成  
就而逝矣弇於伯父姪也知伯父之事詳矣其子若缺  
請銘於弇儻固拒誰之責耶遂據其實以誌其墓而銘  
曰

仁哉伯父沖厚以稱方寸之內至虛且明安時適分不務

外榮惟知教子延禮羣英六十八歲俄頃夭壽人之大患在乎無後公以慶流詵詵之祐刻銘於茲用傳不朽

壽安縣君張氏墓誌銘

故朝請大夫知吉州事吳興姚府君之夫人張氏世為通州靜海人曾大父諱毅大父諱臻考諱日新皆韜晦不仕皇考後用子景山太常博士恩贈大理評事夫人性孝謹方尚少嶷然有立志而柔閑靜莊有足以式閨閭儀文士不獨其父母異之雖父母之族姻皆曰女子

如是難於為傅姆者及歸姚氏也用所以事父母者事其舅姑而婦道之成有加於為子道時在中饋朝夕羞以進惟謹旁無欣助能不忘以止不獨其舅姑材之雖舅姑之黨皆曰為婦如是難於為娣姒者其夫曰吾配順以有正是能君子我者也其子曰吾母慈而節是能成人我者也於是出乎其里閭從其夫子遊且有舊者皆道夫人之能及他子婦母女或爭慕之或歎不及則又相與言曰果也初府君學里中號有志尚念非遊四

方所蘊終不博且出人下夫人歸纔閱旬即勸使行曰家事非所以累君府君用是事進士列為王官遭廷尉平之喪夫人與府君往且辦事比葬客就食野次人數多已而夫人取食器償始嘗與假者至親為澡滌會天冽寒甚觀者難之而夫人方自若盡給而後已府君喜施與愜賓客過逢而夫人尤喜傳會不為絲蓄粒聚計顧家無長物泊如也嗚呼可不謂賢矣乎以夫貴邑封壽安壽六十有二以元豐五年正月某甲子終於其夫

官舍蓋先府君七月而亡六子男曰洸虔州司法參軍  
曰滂蘄州蘄春縣尉曰汲滌沅縣未仕五子女適泗州  
司法參軍應昭若江寧府當陽縣令阮之武知南安軍  
大庾縣劉敏修常州無錫縣丞沈倚一女未嫁於是其  
孤滂抵書於廬陵劉弇曰先君雅知子者子於吾人宜  
不簡將以元豐六年月日塋吾先君於錢塘履泰鄉湖  
西村靈山小原舉吾母夫人以祔也惟是辭不可闕非  
子尚誰可屬銘曰

於惟夫人協吉作嬪媚於姚宗教成閨門躬行斯何惟  
德實有宜家斯何不悔不疚學能劬其夫之才喪以致  
其親之盡將子若孫克紹厥訓俾是銘詩庶其不泯

劉先生墓誌銘

君諱康夫字公南姓劉氏福州候官人彭城之劉系漢  
元王交其昆雲有為隋東萊令者避地南華築堦居之  
號劉堦於是有南華劉而四世至唐以童子起家宰相  
曰晏晏之兄暹累官秘書監汾州刺史君其八世孫也

五代時曰伎者避馬氏亂自鄂州節度判官舟其帑家  
溫陵生文濟王審知以女歸之終吏部郎中遂為閩人  
曾大父諱闕太子洗馬致仕大父諱若虛以文章知名祥  
符間皇考諱奕有經濟材皆終尚書屯田員外郎君兒  
時秀整有成惠書千字輒誦如所嘗熟者其在鳳翔也  
執經從講師退而覆之不失一字皇考終丹陽有哀其  
貧者欲厚賻之君收涕曰名為贈卹孤實疚吾考因却  
不受莆陽蔡公襄以故人子過君一見拜謂母夫人曰

佳子善視之而里人周希孟有重名尤器君希孟號四  
先生之一者君至性絕人服二喪蓋不飲酒食肉衣帛  
者三年罄卧內所有買舍與其弟居後屬他徙指屋以  
告曰留以庇汝家人無敢言者常曰不妄許與遇貴勢  
非其合引去不少貶茨椽菜徑陶甄樨杓對之歡然終  
日不知為貧約也異時守臣以君應治平初孝廉詔書  
故事監司列名有不孰君者諭之見君卒不見明年始  
上君名有司執後時報罷論者惜之程光祿師孟之為

福也奏取州果園隸樓店務實欲授君館且使僦入者  
歸其贏君牢辭不奪程對之歎息民有奪君田舊請於  
官者部使者不直民歸之有司君抵書自言不願校卒  
以畀民熙寧中五路置學官廣東安撫願比廣五路得  
君為學者師朝廷下其事君例進志述二十七篇翰林  
學士沈公括尤稱其文諸公間君讀書先理詣後辭說  
大率於諸經最長靈披梗斲推見聖幽為文疊疊有真  
意似其為人閩越雖妄愚者不計識否皆謂君先生以

布衣涖府學事垂三十年門人至千數登主官者十二  
三晚益肆志經術急勸講凡再主泉學不閱歲遍五經  
雅不事詩賦便君者迫使應書君強為一出輒冠多士  
其程文雖若不刻意聲病家遠不逮也始元少保絳帥  
閩薦君行義不報及後貴用事然終材君甚章復數上  
又不報元謂人曰吾責塞矣元祐初禮部上君格應奏  
名將行謂人曰明年歲在辰吾其已乎然欲止則不得  
陞試之一日君果屬疾又一日以不起聞既而天子第

奏名士方假君承務郎而君死矣聞者痛之於是其孤知至自惠安尉星行護其喪以歸明年正月二十有一日將塋君懷安縣太平里螺峰之原壽五十有五其集有經訓雜文古律詩合百卷夫人黃氏朝奉郎嘉會之女有懿德男子四人知至強學說學敏學女子五人長適陳大方次適周孝嗣皆進士三尚幼知至以專經第元豐八年進士於次為最長前期走書來洪請銘曰子知先人宜詳敢泣血以累嗚呼先生哉祿雖緬諸身世

猶榮其名弇也勒詩禪傍其敢後銘曰

彭城之先系自元王垺居南華東萊汎汎有隘四世晏  
遲嶷唐擲組來泉實始鄂州嬪我姬姜吏部之休揭揭  
公南閩公昌孫天碩其稟肆深雄渾周哦孔睨編聯藁  
束七箸紳屨邈有餘躅如彊厥張注以大羽殪光疑之  
迅過於穿魯孰熾之膏孰根之腴孰窘其豐孰斬其須  
有慶則覃有子則克有銘播幽有安斯宅

觀禪師碑

閩粵右浙左番禺壤迫而民稠男子資秀穎力疆自好則起而為士者常十五六為佛之徒者又五之一焉然佛之徒自其童時已能誦數學涉精博纔一祝髮即拔跡游方巾瓶杖屨從知名師解懸脫桔躍出塵表異時匡廬瀟霍布金之肆諸以禪擅天下多閩粵人至閩粵則其望僧反不逮他處而數百年間求如汀上白衣莆之妙應與夫福唐存備之徒蓋無幾顧寂寥不聞之後能蹠蹠到佛是其尤偉而有如師者出矣師諱令觀俗

姓黃氏莆田人生不茹葷年十三隸廣化寺禮師繼隆  
十八受具戒略通易孟子老莊諸書已而撥去聽講大  
乘經論他日讀楞嚴經駭然大悟曰世徒傳當年圓覺  
之圭峯何知不有今日楞嚴之我耶未幾得寺之安養  
院折節坏戶而居之標尚質素語終日不妄出口非有  
迫致或竟歲未嘗倚閭閱大藏經更數迈雖老益力又  
天性慈甚哀病者而急阨窮呪食放生無不為者賢不  
逮必解衣就質無難色佛事身朝讚夕燈者五十年不

驅蚊不搔餒虱不以匡衆為已任人或戲之曰憊乎觀  
公奚事爾為師曰吾非憊者正恐坐此得憊耳其密意  
警人類如此忽一日示疾語其徒曰有六上人當過我  
亟具茗果衆疑師屬疾語迷謬既而人有賁像自遠至  
者物色之正六則傳金羅漢也暮沐浴黎明更衣敷座  
集衆若辭世者曰勉矣毋負吾佛語已抵掌就寂是日  
愁雲曠空羣鳥鳴悲實元祐八年三月二十九日也壽  
九十一僧臘七十三居三日頂猶溫其首蓋俛而復正

者再用天竺法茶毗於寺之北堦火行有異香收燼得舌  
根不壞觀者駭歎其徒塔之夜有光炯然自茶毗所屬  
塔中如往還狀又三日現金銀色舍利環五里餘尺草  
寸木悉發光耀壓石掘土無不得者而不窮也旁近民  
至取以售用於是長老繼諸狀其事詣余曰凡剃而緇  
者決生平功行每在於臨行拘縱之一靈最後灼肌之  
寸燼耳燼餘佛相既得之觀矣將侈觀之傳使蔓於後  
子則不可以徒默連三請益堅既而曰觀之事赫然可

喜如此而諸之請也不徒知觀又知余則侈觀之傳當  
自諸始而余其一也係以偈言曰

金剛寶王祕密藏

實甚希有首楞嚴

了知一切於剎那

如大壯士屈伸臂

衆生盲龜越浮孔

不撥聚散取泥洹

無漏種智安養佛

封磔疑網知有此

起不退轉得安穩

於彼無生忍法中

妙湛圓明大總持

時取惑者藥其病

爰七十載閱僧臘

當示順日屯雲空

云何舌根歷熾然

猶紅蓮花出遺燼

況復得大堅固力

神光去來宰堵波

普現舍利山樊間

尺草寸木皆發色

取如泉源無有竭

蹶石掘土仍得之

歎未曾有莆之人

一切有情悉擎跏

維大禪伯曰法海

伏請偈言為證明

得不思議有如師

告彼來者庶無愧

興化軍廣化寺法海禪院沙門繼諸

龍雲集卷三十二

欽定四庫全書

龍雲集附錄

周夫人墓誌銘

劉定子先

廬陵劉弇偉明一日過予書意累紙其辭閎毅悲壯激揚有至感移人之氣大要欲為其母銘德於碑以信天下後世顧予聊落心哀文鄙無足充君意者辭終弗得輒取鍾侯明叟之狀考次於篇繫以銘焉夫人周氏吉州安福人曾祖智崇祖光父藻世為巨室夫人天質秀

穎幼不與族兒羣孝仁靜淑女工之巧與夫承上宜衆  
約躬聽姆皆如宿學智通古今語默不苟年十八歸同  
郡浦城縣尉劉君劉氏族姻一一敬之舅姑竊語曰斥  
大吾家儻在此婦歟浦城君疎財厚義而仕不偶晚益  
不屑意夫人曰牛羊會計下至挹關足以事吾食者古  
之人皆然何地之擇乎又曰詘一身不足以信道必為  
可繼盍取端友以遺孫子安可使浮沉宦學白首無見  
耶君亦為之慨然君欲有行夫人每先其意坐有重客

私出簪帨質錢以廣珍醴居無何君不幸曾未及昏嫁  
夫人纔四十餘未問生業收書萬卷以授諸子使畢力  
於學男女之分擇當而止不泰奢侈下之人有過不懲  
而治門內百索區處若無事遠近士族嘆之弇既補官  
迎夫人以養夫人或躬執飪服絺紵績紡以先婦子有  
止之者夫人曰是常生之道在我者也不可一日廢古  
之聖智所以齊天下之家推此而已至於食功於上則  
天也吾老矣正欲以此治汝曹奈何忽之晚年多讀佛

書讀金剛般若經得如實三昧日誦十餘返左右以朱墨積數至盈軸屬疾數日謂家人曰夜夢贊唄鏜鎔迎我梵天梵天何足道此吾壽已夫比啓手足神明晏然略不及他事是時弇以潁昌府臨潁

潁俱從潁

縣令充洪州

州學教授元祐三年十二月二十一日夫人終其官舍壽六十九四男皆進士弇元豐二年以明經及第龔龔畬皆有立三女適歐陽晝鄧寬蕭樞孫延孫女二人明年九月二十五日弇與諸弟奉夫人葬新淦蔣沙之黃

原嶺近代歐陽文忠公母賢少能知其子必顯文忠出  
廬陵名業著天下有母之助焉今夫人之子志行問學  
已如此安知異日不到前賢此銘非特為夫人慶亦使  
知廬陵多賢母也銘曰

金剛所證

神智上行

口傳心稱

萬境真靜

握為明珠

散為雨濡

德其夫子

不出緒餘

惟是族姻

爾思爾勤

封樹象闈

墮淚浥巾

黃原金水

英氣之淵

後三十年

錫守者田

劉偉明墓誌銘

李彥弼端臣

崇寧革號初元之仲春瀛洲文伯劉偉明抱病且死薦  
紳若識若不識鳴掌搏髀甚至殞涕泗胥弔嘆曰於戲  
蒼蒼虜既挺此豪人瑞茲昭代意所以黼黻皇猷笙鏞  
帝暉杞梓儒林丹青文囿為大塊鋪鴻藻與靈氣剖光  
怪一何莽鹵不少商厥齡哉造物胡為而忍諸君名弇

字偉明鼻祖西洛人唐尾有宦遊江西遂為吉之安福人曾祖岳祖賢父慥建州浦城縣尉偉明兒時資警穎誦言日萬餘幼學落筆駸駸類蒲梢汗血駒覘鞭影籥雲嘶人謂是洗凡姿異時振天下名中元豐二年第主通州海門縣簿初恃才不少貶以故人罕知試學官及銓格聯捷魁等調潁昌府臨潁縣令充洪州教授江表東書子鱗湊講席沾溉膏馥者咸為擅場雋丁母憂服除補興化軍錄事參軍七閩士夫競稔其標采紹聖二年

改宣德郎知嘉州峨眉縣適遭宏詞科偉明掄襪曰唐人躡是科躋膺仕今幸有茲舉吾為士寒甚當自策足英纏縱翔雲表素筆玉墀吾何慊一出遂唾手掇之宏詞文磔額啗語自成一種風氣改奉議郎太學博士元符中進南郊大禮賦蔣蔣虜不獨蹂躪班揚要之鼓吹經史丕赫盛時之大典者哲宗皇帝嘉之除秘書省正字今上登極改承議郎賜五品服為禮部參詳官又改朝奉郎秘書省著作佐郎充實錄院檢討官偉明之登

羸也人咸謂宜在承明金馬著作之庭固所以胚胎華  
貫權輿遐舉者然偉明氣剛果趯趯不肯後同列人故  
憊之俄感疾求補外大臣以實錄未竣惜其去已而忽  
疾亟丐致仕竟以不起享年五十有五耳嗚呼真可惜  
其死也真可惜其死也累贈父承議郎母周氏安福縣  
君妻楊氏封金華縣君得一子恩曰孺參太廟齋郎方  
偉明易簣也關幼未省事妻惇無助間關泛數千里路  
僅能揭棺還家以崇寧三年十月八日祔塋臨江軍新

淦縣揚名鄉蔣沙之黃源母安福縣君之瑩偉明少不  
羈嗜酒曠達表表不卹細節哀書萬卷悉經目自稟安  
世語記下至虞初小說稗官之書歷吐牙頰間其為文  
得之天不可躅蓋痛欲剗盪痕類掀抉蠹蝕取所謂疊  
疊不凡者方始揚布直欲踐躅古作者蹊徑人謂刻削  
精魄與造物爭後先此豈長生理哉定以文死者必偉  
明也有文集數十卷茲其半世文爾彥弼生平為握手  
交今偉明瘞穴中已六秋矣久纏宿草之悲默韜掛劍

之恨謹為銘痛哭而紀之詞曰

吁厖鴻之真宰猗顓孕靈毓秀而為偉明羌天姿之傑  
跼猗半漢沛父而疇與嬰睨雲莊以駭遐舉猗躋身蘄  
虩翹英犀渠鶴膝而擁干將猗拔學庫乎蘭綺之兵拊  
儒林而超赳起猗振蒲牢於鱣鏗躩瀛洲而擷靈芝猗  
跋道而影華纓絢麗藻而爛龍鱗猗將火粉堊艘於太  
平睥古作而項背猗眇石渠天祿之崢嶸肆駭難之怪  
珍猗赫紫庭之英莖黃靈詹而惚恍猗樛天道而奚窺

叫帝聞而歎憊惋猗培愴楚而填膺胡大化之嗇厥椿  
猗斬鵬翮而跌瑤京齋頑恨以扃九泉猗韜英骨而泣  
秋螢噓彎虹而累層霄猗曾克騎長康而上征吁嗟乎  
冥茫之黔雷猗司厥命而曷憑軫夫君之溘朝露猗脰  
鳬鶴而置形駕言祖鑣以轡凌兢猗覓逍遙乎太清

龍雲集附錄

跋龍雲集後

文果何物耶大而天地山川細而草木鳥獸蟲魚靡不  
具焉操觚弄翰抒思棲情孰非從事於斯哉而蛩駉鷗  
聒過耳輒息固無以議為者若夫攬天地之秀族山川  
之英擷草木之芳而極鳥獸蟲魚之情使日星不能輝  
鬼神不能靈萬物不能榮者一何鮮耶龍雲先生其可  
謂間世而傑出者矣先生自為舉子時已卓詭不凡文  
藝出諸老先生右甫壯首鄉薦擢進士第繼中博學宏

詞科元符改元進南郊大禮賦君相動色以為相如子  
雲復出即除秘書省正字稍遷著作佐郎駸駸嚮用矣  
高麗傳誦其文方請於朝將待以賓師之位而降年不  
永竟卒於官其平生所為文漫散莫攷浦城所錄纔二  
十有五卷耳雄篇大冊尚多不著良弼惜其流落冥搜  
博訪得彭德源曾如晦等手編數十卷又得宏詞時議  
諸編於內相郭明叔家合而次之得古律賦三宏詞四  
古詩一百四十律詩一百二十一絕句一百一生辰詩

一十一挽詩一十三

總三百九十三首印本止有三十九首

樂府六表一

十七啓五十二

郭本點今附

書四十四序一十四時議六策

問四十五記十雜著五疏語十祭文一十一碑誌一十

二總六百三十一篇為三十有二卷而先生之文略盡


矣先生嘗語南豐文如白玉田種種渾璞如青翰客風

彩秀舉如天驥跼影神理颯灑如喬松弄芝真率徑盡

如炙輶聯環而不窮也如疾菟者之扼熊脰而絕羆臄

也如鋸齒錯列初若齟齬而卒乎其相承也如荀生之

辨車輞叔向之辨勞薪易牙之辨淄澠而不可以非道  
入者吾固謂先生之文如此先生諱弇字偉明吉之安  
成人所居龍雲鄉故以龍雲名集紹興四年甲寅重陽  
日廬陵羅良弼長卿書



龍雲集跋